

**Mou Langat 2 Legakan Rakyat Dan Pelabur
Bernama
27 Februari 2014**

KUALA LUMPUR, 27 Feb (Bernama) -- Apabila Memorandum Persefahaman (MoU) antara Kerajaan Persekutuan dan Selangor termeterai di Putrajaya semalam berhubung penstrukturan semula industri air di Selangor, ia memberi harapan baharu kepada penduduk Lembah Klang, para pelabur dan pemaju hartanah di negeri itu.

MoU itu juga membuktikan bahawa Kerajaan Persekutuan dan kerajaan negeri Selangor boleh duduk semeja untuk menyelesaikan masalah rakyat, walaupun berbeza ideologi politik.

Rakyat di Kuala Lumpur, Selangor dan Putrajaya yang mengimpikan kehidupan selesa dengan bekalan air bersih tanpa gangguan serta keinginan para pelabur yang mahu projek-projek mereka diteruskan dengan mendapat bekalan air terawat secukupnya, kini boleh menarik nafas lega untuk jangka masa panjang.

Ini kerana projek Langat 2, yang dijangka siap pada 2017 mempunyai kapasiti untuk menampung permintaan air terawat sehingga tahun 2025.

Semalam Menteri Tenaga, Teknologi Hijau dan Air Datuk Seri Dr Maximus Ongkili berkata pembinaan Loji Rawatan Air Langat 2 (LRAL2) mampu merawat 1.89 bilion air mentah dari Sungai Semantan, Pahang yang disalurkan melalui terowong sepanjang 44.6 km merentasi Banjaran Titiwangsa hingga ke Hulu Langat, Selangor.

Menteri sebelumnya Tan Sri Peter Chin Fah Kui pernah berkata bahawa pembinaan LRAL2 yang mempunyai kapasiti 1,130 juta liter sehari, sepatutnya bermula pada Jun 2013.

Pelaksanaan projek itu tertangguh berikutan keengganan kerajaan negeri Selangor di bawah pakatan pembangkang, yang mengambilalih tampuk pemerintahan selepas Pilihan Raya Umum 2008, untuk memberi kebenaran merancang kepada projek itu.

Sebelum ini, Menteri Besar Selangor Tan Sri Abdul Khalid Ibrahim meminta supaya projek pembinaan Langat 2 dimasukkan ke dalam rundingan penstrukturan semula industri air yang melibatkan pengambilalihan empat syarikat konsesi iaitu Puncak Niaga Sdn Bhd, Syarikat Bekalan Air Selangor Sdn Bhd (Syabas), Syarikat Pengeluar Air Sungai Selangor Sdn Bhd (Splash) dan Konsortium Abass Sdn Bhd (Abass), oleh anak syarikat kerajaan negeri, Kumpulan Darul Ehsan Bhd (KEDEB).

Bagaimanapun, semalam tanpa diduga Abdul Khalid menandatangani Mou itu bersama Maximus dan bersetuju mengeluarkan kebenaran merancang untuk pembinaan LRAL2, yang dijangka dapat meningkatkan bekalan air terawat bagi menampung peningkatan permintaan di Lembah Klang.

Ketua Pegawai Operasi Syabas, Datuk Lee Miang Koi pernah berkata bahawa permintaan air terawat pada masa ini ialah 4,638 juta liter sehari (JLS) berbanding pengeluaran 4,661 jls sementara permintaan air di Lembah Klang diunjurkan terus meningkat dengan kadar 3.5 peratus setahun.

Pengerusi Majlis Tindakan Persekutuan Selangor Datuk Seri Noh Omar berkata kelewatan kerajaan negeri memberi kelulusan kepada pembinaan LRAL2 memberi kesan buruk kepada imej Selangor yang merupakan sebuah negeri maju di Malaysia.

Beliau berkata setakat tahun lepas, disebabkan rizab air yang kurang di Selangor iaitu hanya satu peratus daripada 20 peratus yang sepatutnya, sejumlah 87,754 projek perumahan baharu, yang memerlukan 147.87 juta liter sehari tidak dapat dimulakan.

Begitu juga dengan pembinaan 6,240 unit kedai dan pusat komersial baharu dengan keperluan air 38.02 jls, 4,330 unit pusat beli-belah baharu yang memerlukan 9.49 jls air, 3,159 unit hotel baharu (10.76 jls), 830 kilang baharu (31.24 jls) dan 4,038 rumah ibadat dan sekolah baharu dengan keperluan air 900,000 liter sehari, tidak dapat dimulakan.

MoU bersejarah semalam merupakan penyelesaian kepada segala permasalahan ini dan menghidupkan kembali harapan rakyat untuk mendapat lebih banyak peluang kerja selain berpeluang memilih rumah idaman apabila projek-projek perumahan dibangunkan kembali dengan lebih rancak.

Sementara itu, pakar-pakar berhubung perkara ini melihat MoU itu sebagai penyelamat kepada krisis air di Selangor dan Lembah Klang.

Pensyarah Seksyen Geografi Universiti Sains Malaysia Prof Chan Ngai Weng berkata Langat 2 adalah penyelesaian terbaik kerana Selangor buat masa ini tidak mempunyai pilihan lain untuk mengatasi masalah kekurangan bekalan air terawat di kawasan itu, yang padat dengan penduduk dan rancak dengan pembangunan.

Ketua Jabatan Pengajian Kenegaraan dan Ketamadunan Fakulti Ekologi Manusia, Universiti Putra Malaysia (UPM) Dr Ahmad Tarmizi Talib pula menyifatkan MoU sebagai "rahmat kemarau" kerana Langat 2 diselesaikan setelah tertangguh selama enam tahun.

Penyelesaian yang dicapai semalam, katanya, membuktikan bahawa kerajaan persekutuan dan kerajaan negeri Selangor boleh duduk semeja dalam mencari penyelesaian untuk rakyat.

"Ini permulaan kepada politik matang. Pemimpin harus sedar bahawa setiap perbuatan dan keputusan mereka diperhatikan. Siapa yang berkhidmat sebaiknya akan terus menjadi pilihan," katanya.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1018063>